

學
究
直
齋
履
考

普安直隸廳志卷之十三

武備志

兵制 師旅考上

三代寓兵於民後代以民養兵而兵民遂分爲二天下財賦半耗於伍符尺籍之中而兵且益竅一旦有事不能得一兵之用論者每致惜於古制之不可復亦不盡然也漢之南北軍郡國兵唐之府兵宋之禁兵廂兵元之五衛萬戶明之京兵衛所兵邊兵內外相制大小相維皆足以靖內難而威四夷初制非不

善也及其流弊則更立一法以救之愈救愈失而良
法蕩然矣天下事何一無流弊察其致弊之所由取
舊制而申明之而天下事固無不治我

朝以騎射開基兵制特詳分作三軍別以八旗悉編

禁旅內衛

神京其分戍外省者爲駐防裁勝國衛所改設鎮協參
遊而綠營之制一新普安彈丸地亦復上煩

睿慮置汛分防隱然有碁布星羅之勢蓋自

聖祖蕩平吳逆民不知兵者二百年

武功之赫震古鑠今勁旅雄師列營相望雖百年無事焉
可也

承平日久將若兵安享無事之福驕惰成習而羣盜乃突
起相乘天下無完邑而普安且無完里諸營兵非亡
則虜無得免焉當是時也全黔糜爛糧竭援絕逆回
方置酒高會以爲莫余毒也然而忠義之士蹈死如
飴豪傑之徒乘時投袂相持十餘年屢蹶屢奮卒能
摧破亂黨轉危爲安逆回目無官兵初不意斯民感
累朝休養生息之

音字屬示
卷一三
二

恩而矢心圖報者固盡人皆兵也修我矛戟作玉干城野
人負禦侮之才婦女知敵愾之義三代遺風於茲未
墜矣嗚呼食其祿者忘其事民猶如此而況於士卒
乎而況於將率乎志武備

普安直隸廳志卷之十三

武備

兵制

明

普安衛轄千戶所六

安南所

所城初在楊那山正統中徙羅渭江在今興義縣之羅渭屯

安隆所

所城在今興義府城

樂民所

所城在今樂民里

平彝所

所城在今平彝里

中左所

所城在今興義縣中左里

中右所

所城在今興義縣中右里魯屯

按明制衛轄所惟守禦千戶所不隸衛直隸都指揮安南安隆爲守禦千戶所興義府志謂二所不隸普安衛據明史職官志爲斷而以明史地理志安南安隆二所屬普安衛之說爲非考大定府志載大定府明代設衛三曰烏撒曰畢節曰赤水守禦千戶所三曰七星關曰阿落密曰前所洪武二十一年置守禦七星關千戶所初隸烏撒衛永樂

中改屬畢節衛赤水衛領所四其二即阿落密前
所皆終明世不改然則守禦千戶所直隸都指揮
者其大同也隸衛者其小異也今依明史地理志
列安南安隆二所於普安衛之下仍俟再考

又按明志衛轄五所普安衛僅得樂民平彝中左
中右四所若合安南安隆二守禦千戶所則又六
所與制不符考平播後設威遠衛與府同城李化
龍善後疏云應設指揮使一員同知二員僉事二
員鎮撫一員經歷一員知事一員所屬前後申左

右五所每所正千戶一員副千戶一員百戶四員
所軍各一千共五千已徵與定制異矣遵義舊志
云威遠衛有掌印指揮又有管屯指揮餘官並具
惟無知事又云威甯衛在府治左立所三鎮撫經
歷各有定員置軍一千二百名是設衛時不盡依
李議亦不盡依定制也赤水衛領所四峴亦不盡
符定制然則普安衛所領之所或四或六當係因
地立制不必以他衛之例相繩也抑或中所即設
於衛城而兩守禦所不隸衛耶衛所之官員兵丁

依制與否不可知樂民平彝二所誰爲前所誰爲

後所亦不可知缺以俟考

舊志樂民平彝安南安隆四所各守禦千戶一

是平彝樂民亦守禦千戶所也不知所本

國朝

康熙二十二年裁普安衛置普安營

舊志謂裁衛置營在二十六年

與營冊異

設守備一員千總一員把總二員兵二百八十

名內馬戰兵二十八名步戰兵一百一十二名守兵

一百四十名存城守備一員把總二員兵一百八十

名分防亦資孔汎千總一員兵一百名

雍正七年設經制外委把總一員

仍食本名馬糧

七年移驛道於劉官屯設劉官屯汛分防劉官屯汛把總一員兵五十名存城守備一員把總一員外委把總一員兵一百二十九名

十一年改守備爲都司十一月十九日頒到都司關防一顆

乾隆二年增兵二百二十名凡五百名內馬戰兵四十九名步戰兵二百名守兵二百五十名增設經制

千總二員外委把總四員分左右二哨改安南營分

防之楊松礮子窰烈當三汛歸營轄於是有都司一員千總三員把總七員分防楊松汛把總一員兵十五名分防礮子窰汛千總一員兵一百名分防烈當汛把總一員兵五十名分防亦資孔劉官屯者如故餘存城

七年裁外委把總一員兵六十名內存城兵四十名礮子窰汛兵二十名

十年撥存城兵五名礮子窰汛兵三十名增楊松汛兵凡五十名

二十年移確子審官兵駐白沙汎移楊松官兵駐上
寨汎裁烈當汎撥原防兵二十名增白沙上寨二汎
又撥十一名增劉官汎汎撤把總一員兵十九名歸
城營於是城營增把總一員有兵一百五十七名劉
官屯兵六十一名白沙兵六十名上寨兵六十名

二十七年設額額外委把總二員

仍食本
名馬糧

三十四年設額額外委把總一員

仍食本
名馬糧

四十四年裁新設額額外委把總三員

四十七年裁養廉虛兵三十八名公糧虛兵十三名

冗糧虛兵七名分防亦資孔兵九十五名劉官屯兵五十七名白沙上寨兵各五十六名存城兵一百一十四名實存馬步兵丁三百八十二名

五十一年改普安營都司移駐安南營改安南營遊擊守備移駐普安營撥提標兵一百二十名增本營於是有遊擊一員守備一員兵五百二名分防亦資孔汎守備一員千總一員外委把總一員兵一百四十名分防劉官屯上寨白沙各把總一員兵六十名餘存城

咸豐三年裁兵五十一名

同治元年廳城失陷關防軍裝皆毀失先是營兵奉調出征沒於王事者幾三百人至是無一存者二年城復大府僅委各官到營原額兵丁未及募補

光緒三年貴州巡撫黎培敬奏復黔省綠營兵五成普安營復設兵二百二十七名內馬戰兵十一名步戰兵一百名守兵一百十六名

五年十月貴州巡撫岑毓英奏改防勇爲練軍撥

廳營馬步戰兵歸練軍營實存守兵二百三十二名

九年二月裁綠營兵二成本年裁兵四十六名實存
守兵一百八十六名

十一年四月裁外委一員

見制普安營遊擊一員千總二員把總四員外委一
員守兵一百八十六名存城遊擊一員千總一員把
總一員外委一員兵六十九名分防亦資孔汎守備
一員千總一員兵五十一名分防劉官屯汎把總一
員兵二十二名分防上寨汎把總一員兵二十二名
分防白沙汎把總一員兵二十二名

城營僻路六塘

水塘塘 撒麻塘 鞅橋塘 華納塘 鸚哥卡塘

本城塘

各塘兵一名

亦資孔汎大道十塘

永安塘 硝硎塘 魯尾塘 蛾螂塘 亦資孔塘

大坡塘 海子塘 平彝所塘 馬桑卡塘 馮家

庄塘

各塘兵一名

劉官屯大道七塘

本汎塘 舊營塘 楊松塘 大山了塘 支家屯

塘 大山凹塘 陸官屯塘 各塘兵一名

上寨汎大道六塘

上寨了口塘 南車塘 礮子窰塘 上寨本汎塘

中寨塘 崧歸塘 各塘兵一名

白沙大道八塘

本汎塘 舍基塘 半坡塘 丁寨塘 老鷹卡塘

花貢塘 安黑塘 花市塘 各塘兵一名

按廳營文卷遺失無存茲僅就營中來冊刪其繁冗而備書裁減年月營汎官兵數目於冊以存舊

制舛否不可知至官兵數目前後參差無憑考証
仍之

普安直隸廳志卷之十三

武備

師旅考

上

莊躒

後漢書作莊豪

楚人莊王裔孫初爲盜吏弗能制後爲

楚將頃襄王遣躒沂沅水出且蘭以伐夜郎椽船於

岸而步戰於是且蘭旣克夜郎又降遂至滇池旁平

地肥饒數千里以兵威定屬楚欲歸報會秦擊奪楚

巴黔中郡道塞不通因還以其眾王滇變服從其俗

以長之以且蘭有椽船處乃改其名爲牂柯以旌其

伐公侯支黨傳數百年

建元六年太行王恢擊南越

按本紀在六年八月

東越殺王郢

以報恢因兵威使番禺令唐蒙風指曉南越南越食

蒙枸醬蒙問所從來曰道西北牂柯牂柯江廣數里

出番禺城下蒙歸至長安問蜀賈人賈人曰獨蜀出

枸醬多持竊出市夜郎夜郎者臨牂柯江江廣百餘

步足以行船南越以財物役屬夜郎西至桐師然亦

不能臣使也蒙乃上書說上曰南越王黃屋左纛地

東西萬餘里名爲外臣實一州主也今以長沙豫章

往水道多絕難行竊聞夜郎所有精兵可得十餘萬
浮船牂柯江出其不意此制越一奇也誠以漢之強
巴郡之饒通夜郎道爲置吏甚易上許之乃拜蒙爲
中郎將將千人食重萬餘人從巴蜀笮關入遂見夜
郎侯多同蒙厚賜喻以威德約爲置吏使其子爲令
夜郎旁小邑皆貪漢繒帛以爲漢道險終不能有也
乃且聽蒙約還報乃以爲犍爲郡發巴蜀卒治道自
夔道指牂柯江元鼎五年南粵反使越馳義侯遣別
將巴蜀罪人發夜郎兵下牂柯江咸會番禺且蘭君

恐遠行勞國虜其老弱乃與其眾反殺使者及獯爲太守漢乃發嘗擊南粵者八校尉擊之會粵已破漢八校尉不下中郎將郭昌衛廣引兵還行誅隔滇道者且蘭斬首數萬遂平南夷爲牂柯郡夜郎侯始倚南粵南粵已滅還誅反者遂入朝以爲夜郎侯

呂破胡官水衡都尉漢昭帝始元元年夏益州廉頭姑繒反殺長吏牂柯談指同並等二十四邑皆反凡三萬餘人帝遣破胡募吏民發蜀郡犍爲奔命萬餘人擊牂柯大破之

河平中夜郎王興與鉤町王禹

按本書紀云始元六年詔曰鉤町侯亡波

率其邑君民擊反者斬首獲虜有功其立亡波爲鉤町王

漏臥侯俞更舉兵相攻

牂柯太守請發兵誅興等議者以爲道遠不可擊乃遣太中大夫蜀郡張匡持節和解興等不從命刻木象漢吏立道旁射之杜欽說大將軍王鳳曰太中大夫匡使和解蠻夷王侯王侯受詔已復相攻輕易漢使不憚國威其效可見恐議者選更復守和解太守察動靜有變乃以聞如此則復曠一時王侯得收獵其眾深固其謀黨助眾多各不勝忿必相殄滅自知

罪成狂犯守尉遠藏温暑毒草之地雖有孫吳將賁
育士若入水火往必焦沒知勇亡所施屯田守之費
不可勝量宜因其罪惡未成未疑漢家加誅陰敕旁

郡守尉練士馬大司農豫調穀積要害處

師古曰要害者在我

爲要在敵
爲害也

選任職太守往以秋涼時入誅其王侯尤

不軌者卽以爲不毛之地亡用之民聖王不以勞申

國宜罷郡放棄其民絕其王侯勿復通如以先帝所
立累世之功不可墮壞亦宜因其萌芽早斷絕之及
已成形然後戰師則萬姓被害大將軍鳳於是薦金

城司馬陳立爲牂柯太守立前爲連然長不韋令蠻夷畏之及至牂柯諭告夜郎王興興不從命立請誅之未報迺從吏數千人出行縣至興國且同亭召興興將數千人往至亭從邑君數十人入見立立數責因斷頭邑君曰將軍誅亡狀爲民除害願出曉士眾以興頭示之皆釋兵降鉤町王禹漏臥侯俞震恐入粟千斛牛羊勞吏士立還歸郡興妻父翁指與興子邪務收餘兵迫脅旁二十二邑反至冬立奏募諸夷與都尉長史分將攻翁指等翁指據阨爲壘立使奇

兵絕其饗道縱反間以誘其眾都尉萬年曰兵久不
決費不可共引兵獨進敗走趨立營立怒叱戲下令
格之都尉復還戰立引兵救之時天大旱立攻絕其
水道蠻夷共斬翁指持首出降

諸葛亮字孔明瑯琊人官蜀漢丞相昭烈帝崩高定
恣睢於越巂雍闓跋扈於建甯朱褒反叛於牂柯亮
南征由水陸入越巂而別遣馬忠伐牂柯李恢向益
州夏五月亮渡瀘時雍闓爲高定部曲所殺孟獲代
闓爲主亮與獲戰生虜之赦使還合軍更戰七虜七

赦獲止不去曰丞相天威也南人不復反矣亮平定
牂柯諸郡乃分建甯牂柯置興古郡以馬忠爲牂柯
太守

章武元年庾降都督鄧方卒先主問恢誰可代者恢
對曰人之才能各有短長故孔子曰其使人也器之
且夫明主在上則臣下盡情是以先零之役趙充國
曰莫若老臣臣竊不自揆惟陛下察之先主笑曰孤
之本意已在卿矣遂以恢爲庾降都督使持節領交
州刺史住平彝縣後主建興三年丞相諸葛亮南征

別遣馬忠代牂柯恢向益州恢案道向建甯諸縣大
相糾合圍恢軍於昆明時恢眾少敵倍又未得亮聲
息給謂南人曰官軍糧盡欲規退還吾中間久斥鄉
里乃今得還不能復北欲還與汝等同計謀故以誠
相告南人信之故圍守怠緩於是恢出擊大破之追
奔逐北南至盤江東至牂柯與亮擊勢相接南土平
定恢功居多

馬忠字德信閬中人從丞相亮南征亮遣馬忠代牂

柯破之

張嶷字伯歧南充人南夷豪率劉胄反嶷隨馬忠討平之後牂柯興古獠種復反忠令嶷領諸營往討嶷招降二千餘人悉傳詣漢中賜爵關內侯

王遜字邵伯魏興人仕郡察孝廉累遷魏興太守惠帝末西南夷叛甯州刺史季毅率故吏毛孟詣洛求赦且請刺史至欲自刎朝廷憐之乃以遜為甯州刺史南夷校尉時荒亂後倉無斗粟眾無一旅官民虛竭繩紀弛廢遜惡衣菜食招集夷民夷徼厭亂漸亦返善勞來不怠數年克復以五茶夷昔為亂首圖討

之未有致罪會夷發夜郎莊王墓遜因此遂討滅之
及討惡獠剛夷數千落威震南方官至平西安南將
軍又兼益州刺史加散騎常侍封褒中伯而嚴猛太
過多所誅鉏犍爲太守朱提雷炤流民陰貢平樂大
守董霸破牂柯平夷南廣北降李雄建甯爨量與益
州太守李易梁水太守董謹保興古槃以南叛雄遣
叔父驤破越嵩伐甯州遜使使督護雲南姚崇距驤
於螳螂縣違遜指授雖大破驤不獲遜以崇不窮追
也怒囚羣帥執崇鞭之怒甚髮上衝冠冠爲之列袞夜

中卒

大德五年雲南土官宋隆濟叛水西土官之妻蛇節以其眾應之時雲南行省右丞劉深將兵征八百媳婦由順元入雲南調民供餽宋隆濟因給其眾曰官軍征伐汝等將盡剪髮黥面爲兵身死行陣妻子爲虜眾惑其言遂叛蛇節亦以劉深脅取其金三千兩馬三千匹遂偕烏撒烏蒙東川芒部及武定威楚普安諸蠻以應焉六年三月命也速鐸兒分道率師討平之

景雙鼎字純陽上元人嫻將略驍勇善戰初元末從軍隸元將王部下至正十七年偕志歸明太祖以積功授光祿大夫都督同知洪武六年雲貴尙爲元守太祖命雙鼎守廣西泗城等二十四土司以圖進取雲貴且命便宜從事擇地駐劄雙鼎受命乃自泗城攻取元之普安路駐劄於黃坪

卽今興義縣黃坪營

其攻取之

地東至香樹塘南至捧鮓

卽今興義縣捧鮓營

西至梅家山北

至營盤山之逃軍洞

今廳地

而雲貴屯衛自此起矣後

卒於黃坪子孫遂家焉

見景雙鼎墓志

傅友德字惟學宿州人

或云碭山人

太祖功臣封潁川侯

洪武十四年爲征南將軍藍玉沐英副之將步騎三十萬趨貴州由普定進克普安降諸苗循格孤山而南通永甯兵叙功進封潁國公子世券二十一公越州土酋阿資與普山府土知府普旦同反陷普安燒府治大肆剽掠友德率兵擊之斬其營長二十二年進攻普旦來降阿資退屯普安倚崖壁爲寨友德以精兵蹙之蠻眾皆緣壁攀崖墜死者不可勝數生禽一千三百餘人獲馬畜甚眾阿資遁還越州復追擊

敗之斬其黨五十餘人阿資窮蹙請降二十六年賜死嘉靖中因何孟春奏請立祠祀之

沐崑襲國公爵洪治十二年嘗平普安賊正德二年阿本作亂崑伏軍盤江截賊巢大破之七年安南長官司那代爭襲殺崑討擒之卒贈太師謚莊襄

仇成含山人太祖功臣封安慶侯從傅友德南征平普安諸苗成之功居多

張銓定遠人亦太祖功臣從傅友德平普安苗封永甯侯

永樂元年故貢甯安撫者昌之子慈長言建文時父
任是職宜襲吏部罷之本境地濶民稠輸糧三千餘
石乞仍前職報效命仍予安撫十三年慈長謀占營
長地且強娶民人婦爲妾殺其夫闖其子事聞命布
政司孟驥按狀慈長糾兵萬餘圍驥驥以計擒之速
至京死於獄

蕭授華容人官貴州總兵宣德二年普安諸苗相聚
爲寇授且捕且撫諸苗後先聽命承旨赦之七年又
諭降安隆酋岑俊後官至左都督卒謚靖襄

王軾字用敬公安人天順八年進士宏治十三年拜
南京戶部尚書十六年兼左副都御史督貴州軍務
討普安夷婦米魯平之米魯者普安州土判官隆賜
後妻也嘗以忤賜出居其父霑益土知州安民家賜
前妻子禮因賜老奉朝命替賜爲判官而聽營長阿
保讒父子間不相能魯覘知之諷阿保使禮迎己同
室居禮因烝魯賜聞大怒立殺禮燬阿保寨阿保乃
挾魯及統其子阿鮓莫阿歹兒攻賜賜敗竄之雲南
時東甯伯焦俊爲總兵官與巡撫錢鉞召阿保及賜

曲爲調釋而讐以官法各唯唯於是魯遂陰中暢毒
暢死阿保與魯據寨反會暢有妾適烏生二子曰珀
曰瑤居安南堡魯欲并殺珀瑤絕暢後於安南城外
築阿先硬寨於普安州拖長江諸處令阿鮓莫阿歹
兒互爲防守更名所居寨爲承天寨號無敵天王出
入建黃纛御史張淳飭捕之不克賊益橫鎮巡官以
聞十一年乃命發十衛官軍及諸長官司士兵萬三
千人餘分道進兵且召安民責以匿賊狀使殺賊自
贖安民乃率士兵攻斬阿保父子於查刺寨魯走匿

安民家安民陰資魯兵五百襲殺適烏及二字珀瑤
密遣營長福祐隨魯據別寨肆殺掠且投牒鎮巡乞
以女土官襲職巡撫錢鉞及副使周鳳都指揮劉英
吳遠指揮任禮張英楊芳太監楊友總兵官焦俊皆
受魯賄請宥魯聽襲朝議獨不可切責之必得魯乃
已會副使劉福自謂知兵眾倚之進討營於阿馬坡
而福仍作移文取賊賂賊憤甚乃襲殺周鳳吳遠劉
福等執楊友而布政司閻鉅指揮史韜李雄郭仁李
忠武等皆轉戰死上乃命軾及巡撫陳金都指揮李

政等統官軍進勦奪楊友還破阿舊阿滿阿黑阿維
二十餘寨斬寨首阿烏阿宗及福祐子阿咎而米魯
福祐皆走匿馬尾籠大兵合圍攻益急土官鳳英等
格殺米魯餘黨悉平下安民於獄既而赦之正德元
年賜族土婦適擦襲土判官職親赴京朝賀貢馬上
甚嘉之或曰適擦亦暢妾

張淳合肥人宏治中官貴州巡撫監王軾軍平米魯
之亂厥功甚偉

曹祥字應麟歙縣人正德中官貴州巡撫普安苗阿

則糾黨煽亂祥帥師平之武宗賜璽書金幣慰勞

傅宗龍字仲綸昆明人進士天啟三年官貴州監軍

初天啟二年宗龍官御史時黔苗安邦彥反土寇蜂

起宗龍上疏自請任戰疏言攻圍普安爲滇黔門戶

患者龍文治妻及其黨尹二困安南據關索嶺者沙

國珍及羅應魁輩爲武定尋甸患者土司祿萬鍾爲

霑益羅平患者賊婦設科困烏撒者安效良臣皆悉

其平生非臣敵臣願以巡按兼貴州監軍滅此羣醜

熹宗大喜下部議會宗龍以疾歸不果行明年黔撫

王三善爲降賊陳其愚所紿敗沒乃起宗龍以巡按
監貴州軍征苗初部檄滇撫閔洪學援黔以不能過
盤江而止

按時盤江鐵索橋尚未建

及宗龍即家奉詔自滇過行

洪學命參政謝存仁參將袁善士官普名聲等以兵
五千送行宗龍由安南普安戰且行直渡盤江寇盡
破乃遣謝存仁等以土兵七百馳赴貴陽擒斬陳其
愚軍心大快後以積功官至兵部尙書崇禎中命總
督陝西三邊軍務勦李自成時自成有眾五十萬宗
龍與戰於龍口勝之追賊遇伏諸將潰走宗龍被圍

血戰五日食盡殺馬以食軍士馬盡殺賊取屍以食
既而矢與火藥俱盡乃夜半突圍出殺賊千人且戰
且走未至頂城六里賊追及被執賊執宗龍至頂城
呼門者曰啟門納傳督宗龍大呼曰勿啟門我不幸
陷賊復罵賊曰我大臣殺則殺耳豈爲賊賺城以綏
死賊抽刀擊宗龍中腦剝耳鼻死事聞莊烈帝曰可
謂盡忠矣贈太子少保謚忠壯廕子子祭葬

趙廷臣字君憐鐵嶺人後隸漢軍鑲黃旗順治十五
年爲貴州巡撫時大兵南征盤江鐵索橋爲李定國

燬廷臣修之勒石橋側十六年奏設尾灑新興等驛

按尾灑驛在今安南縣新興驛在今普安縣

旋升總督十七年四月明馬

乃營土目龍吉兆叛

按馬乃地今隸普安縣

掠安南泗城初雲

貴既平土司俱奉職受約束惟吉兆與安南市軍王回子爭田相仇吉兆因收養亡命造械奸民文元等

附之使人要結李定國爲聲援約鼠場營土目龍吉

佐樓下營土目龍吉祥反

按鼠場樓下二營地今皆隸普安縣

掠泗城

水寨及安南衛阿計屯諸處所過恣屠戮廷臣與巡撫卞三元數遣使招之不降乃合疏請討之十一月

廷臣帥兵廣羅總兵趙良棟等

後亡雲貴總督謚襄忠

征馬乃

分軍三路吳三桂遣總兵馬寶趙良棟助之十九日

破果母寨殺賊數千擒吉兆子吉佐妻斬文元等於

陣乘勝攻卡呻寨吉兆閉寨堅守廷臣圍之十八年

二月廷臣令軍士人持一炬投其寨焚之執吉兆及

其黨斬之叙功加兵部尙書後調浙江總督卒謚清

獻

按戰國時莊躄率師入滇必取徑盤江是爲普安

見師旅之始自時厥後代用師旅於黔中亦皆在

他郡邑間有遠涉茲地如李恢之戰盤中關索之道永甯以意度之廳城豈能獨完舊志暨他郡邑志多談唐蒙事蒙略通夜郎未動大眾史無明文未便曲爲附會茲編於明以前軍事斟酌去取簡不欲略詳不欲繁亦姑從其同云耳

又按西堡明屬普定衛

今屬安平縣

洪武二十六

年長官司阿德作亂都指揮顧成平之永樂二年阿骨阿哈與水西頭目阿閉妨宜共爲亂總兵官蕭授平之天順四年蠻賊楚得隆聚眾焚劫右副

總兵李貴平之成化十一年苗賊阿屯堅婁亂十
五年總兵官吳經平之通志安順志皆屬之普定
衛興義志削之甚嘗舊志載之誤矣廳有西堡無
阿果獅子孔當由普定普安字形近而譌耳舊志
亦僅載李貴平楚得隆而無顧成諸人且載之山
川門而不入師旅尤所未曉又舊志古蹟門載姚
崇爨琛大破李驤於螳螂亦不入師旅李驤渡瀘
水寇甯州瀘水在今四川建昌府爲川滇要路必
不紆道走廳境滇省下游有螳螂嶺螳螂溪猶未

可指爲姚崇戰地况廳屬乎堂狼螳螂音同字異
何遽舛謬至是舊志隨手雜采似此者十之三四
概與芟除未便一一攻詰也

又按普安廳於康熙二十一年始奉正朔其先遭
孫可望吳三桂世璠之亂蹂躪最甚屠殺亦慘舊
志修於乾隆戊寅相距不過百年已無一字述及
則當日之散佚已可知矣茲志續修於二百餘年
之後載籍無徵傳述失實只得仍從闕如耳至嘉
慶二年南籠狝苗之變賊至南里楂子嶺被鄉民

擊退

詳古蹟門

廳境未有賊氛亦無可撰述云

普安直隸廳志卷之十四

武備志

師旅考下

咸豐四年秋九月安南縣巴林土匪王打匠涂令恒反
據新城廳城戒嚴

新城故普安縣治也康熙二十二年移縣治於新興
所而改設縣丞以理之城多回民藏垢納污由來舊
矣咸豐四年九月杪貴州學院黃統按試興郡歸宿
焉賊首王打匠涂令恒糾劫行轅文卷輜重無一存

者與人負黃出僅以身免賊屯踞城中十月一日報
至廳城戒嚴

冬十月普安廳同知毓現督團復普安縣十五日克之
賊攻安南縣十月五日城破縣令朱右賢夫婦朝服
坐公堂痛飲極罵均遇害越二日進攻普安縣城中
畢逃虛無人縣令崇璟知事不可爲遣二公子他避
賦七絕四章有死多遺憾負君親屬兒一語惟忠孝
及從今携手泉臺去有女相隨亦不孤之句賊入璟
大罵不屈與其室人幼女及家屬五口死之是日重

霧晦冥歷二十餘日不解蓋忠魂之所凝結也同知
毓琨聞警飭鄉團防堵奸民李福壽者遵義人隨父
寓城北之平街少游惰亡去爲盜賊遣之歸訶虛實
約於平街放火俟城中出救而潛襲焉爲館驛坡民
王登雲胡騰麟盤獲隨獲其黨王小妹韓端公楊演
駢戮之賊失內應乃不敢上竄琨調武生劉清明監
生陳崑山隴建鰲尹朝龍等率兵民復普安縣十二
日劉清明截路擊賊擒僞將軍十餘人琨設朱右賢
崇璟位於忠烈廟斬賊首以祭崑山等亦各有俘斬

十五日克復普安縣生獲僞帥二人賊黨七十餘人
皆斬之忠烈廟前賊遁歸新城

二十八日安義鎮總兵金剛保督民團克新城

剛保有事於省垣聞警率帳前親軍趨歸紳團環馬
請攻新城剛保以兵少辭對曰賊以公公出必無備
若公歸鎮發兵符曠日持久賊得爲備難卒克願及
今進攻團民集此待公久矣公有命萬眾可立致也
剛保許之二十八日至新城一鼓而拔之王打匠涂
令恒伏誅

或曰興義府知府張鏐率團兵
攻新城比剛保至而城已克矣

十二月同知毓琨赴普安縣安民

縣新喪亂新尹不時至人心皇皇琨親往撫慰調漢
回團民各五十人作親軍小隊以大坡舖回民張凌
翔充回軍隊長安鄰民即以固邊圍琨兩得之矣比
反仍暫留防護以壯聲威凌翔因得出入官府備覘
城中虛實矣

五年

六年遣兵防邊

上年滇省回變平彝縣阿丈冲回民桂麻六丁長明

馬頭山回民馬雙有馬三黃等陰蓄異志至是揭竿而起張凌翔潛率回黨三百人往助之毓琨念賊勢日逼會商普安營遊擊鄧逢霖委亦資孔汎守備彭天相干總梁有福把總莊承恩郎岱營守備胡現龍安南汎把總楊失名率兵三百名分駐平彝里龍家溝海馬庄紙廠羣山了口以禦之

始捐輸

始派民間捐輸備防費也

秋七月署普安廳直隸同知夏成業蒞任

七年秋八月十日回逆下竄防兵擊敗之

八月十日回逆桂麻六等竄至龍家溝防兵迎擊之
賊敗退

初籍丁

苗匪號匪滋事黔中騷然兵力不敷大府檄各屬練
團簡丁壯爲民兵因地防守

八年冬十一月九日張凌翔反陷沙陀黎平府教授高
發揚等死之十日陷亦資孔城

凌翔少無賴日從市井惡少遊喜技擊頗爲曹輩所

推以此雄長回族嘗遊滇雲滇回之不法者咸暱之
因習爲盜時滇中殷富多鹵獲滿載而歸曹輩豔之
未幾卒彝縣回變凌剽乘勢鼓眾往入夥自後往來
約結以爲常顧深自匿未嘗公然荷戈出境也沙陀
高氏廳之望族也族大而豪高氏娶婦道出大坡舖
回族循土俗取泥土擲香輿高氏疑其侮已以爲大
辱由是有隙俄大坡舖回人娶婦經沙陀高氏報之
加虐焉回族亦忿釁滋深時解元高發揚拔貢高發
祥均以學官致仕家居聞大坡舖之黨滇回也具牘

請剿陳崑山等亦合詞亟請一時人言嘖嘖咸思滅
此朝食蓋逆料回族之必叛冀及其萌蘖而芟薙之
也夏成業念回族越境作賊無與吾廳事緩之則猶
可暫安急之則立起相角且彼方飾爲恭順是有愧
心可以計籠絡也卒不許召凌翔等至署收之門下
曲意慰藉回由是益驕縱把持官府侮慢紳士怒馬
鮮衣揚揚過城市小民熟視之無如何也凌翔欲報
高氏而未有隙會所使往平彝縣回巢者經廳境猴
跳石爲鄉團盤獲凌翔慙憤遂反冬十月八日凌翔

馬小雙率同匪千餘攻沙陀變出倉卒高氏未及防
闔門拒守一晝夜外無援者賊攻愈力卒破入發揚
及其長子斯芬次子文生斯蒂偕突圍出斯蒂既出
不見父復隻身橫鎗反尋父力竭均遇害斯步負父
發祥戰且走賊並殺之舉人發奎諸生發軔斯升斯
翥等皆死發奎謹厚無忤同族素重之發揚等與同
族構釁發奎諫不從凌翔入沙陀傳呼曰勿驚高璧
鄰先生璧鄰發奎字也發奎不知而逃亦被害天明
同匪見之惋悼不已以門扉昇屍置門首懼焚也同

疾高氏久縱火燔室廬并其族三百餘口屠焉十日
復陷亦資孔城分掠旁近之西堡水田蛾螂舖海馬
庄馮家庄死亡者過半

二十三日北里團兵克馬脚色賊首張三保伏誅南里
團兵攻華家屯敗績文生石玉振彭國楨武生陸璿
耀唐思欽死之

同變聞夏成業大懼始議防勦檄鄉團堵要害陳崑
山堵東南文生李夢松堵西北調南北里團丁萬二
千餘分二路進師把總易飛熊率白沙罐子窩團丁

三千餘從鄧遊擊逢霖由中路攻大坡舖二十三日
歐陽榮琳督北里圍丁攻馬腳色回砦克之斬賊首
張三保及逆回數人火其砦餘黨奔大坡舖我師亡
陸老開等八人南里圍丁攻華家屯回砦大坡舖悍
回來援我師驚潰斃圍丁數十人時承平日久民不
習戰見有傷亡皆駭退是夕北里營亦潰中路援兵
不動故獨完二十七日成業飭各團會拖長江圍三
路進攻大坡舖均不利十二月四日復進勦亦失利
而反成業稟大府趣發兵

九年春正月十二日賊圍我師於東瓜灘

十二日鄧逢霖檄外委賈連樾率兵偕拖長江團首任士雄駐守東瓜灘賊圍之數重盡銳力攻亡圍丁七名營兵斃者無數十五日廳城救至賊解圍去

聶土瓜營潰

上年臘月拖長江團首李夢松敖士虎疾各團心力不一議獨以已圍進攻而各團捐軍糧子藥助之眾將從之及是兵潰議遂寢

二月守備余成龍陣亡

成龍郎岱廳人奉委勦大坡舖卒練二百人至一夕
即往海子舖巡視營地遇賊力戰死之成龍少貧棄
家浪遊從技師習刀契又法尤精業猴戲嘗至廳城
售術既拋場轉又而舞初猶見肩手頃之白光迷離
人與又均無覩矣成龍雖操賤業而氣宇爽伉無齷
齷卑瑣態好事者喜從之遊黔中賊起應募從征恒
深入殺賊官至守備及卒都人士惜之

團營潰存城干總熊玉發死之

賊分黨攻撲中路魯土營下四馬營均潰熊玉發陣

亡南里小洞營亦潰賊追急殺亦資孔守備彭天相
圍丁死者數百人

代理魯土營土司龍杓敗賊於豬頭山

杓魯土營土司龍汝馭之從姪也汝馭卒子幼杓代
土司事率土民千餘隨遊擊鄧逢霖營於豬頭山回
逆屢來攻皆爲杓所敗汝馭弟代理土司汝駒亦著
戰績

安義鎮總兵金剛保署興義府知府胡霖澍率師勦廳
賊

霖澍躁妄聞大坡舖回變意輕之欲藉立功邀遷擢稟大府請越境赴勦大府壯其志許之上年十二月二十五日霖澍至廳城陸續調興義府興義縣團丁五千餘並請安義鎮總兵金剛保率營兵千餘助勦霖澍遇事獨斷與廳中官紳爲梗剛保寬柔不能制霖澍薄廳團復調興義木卡仲家團之善投石者二千餘人

置碎石籃中臨陣擊人俗呼爲石頭練

築七大營於海子舖馮

家庄水田委鎮標千總薛明訓統諸團兵又遣監生

姜玉清巡視各營同知夏成業命二役隨行猝遇賊

玉清死焉霖澍重刑二役以不與姜生同死也成業
招降大坡舖回逆張老六等三人霖澍戮之坐是官
紳解體而回逆益忿

夏六月十六日回匪攻聯營我師潰安義鎮把總普懷
恩上寨汛把總蕭本忠死之

六月十六日回匪盡銳攻官軍七營皆潰把總普懷
恩蕭本忠戰死興郡團練死者千餘人明訓逃歸遺
失器械軍糧無算二十日賊游騎至劉官屯城中民
團出擊俄賊眾奄至我師大奔賊直撲廳城焚平街

民居百餘椽守城兵圍迭施鎗炮賊退駐聖宮成業
作書諭之略曰若輩屠沙陀余稟牘中飾爲仇殺畏
罪拒戰尙可彌縫若攻城則反是實矣速去勿取重
禍賊得書乃歸巢二十一日霖澍夜遁走普安縣委
普安縣令劉代英偕成業詣大坡舖撫諭並飭濫木
橋回武生張定中張大回子張二回子及興義府城
回民隨往張凌翔等念成業相待厚乃許和金總兵
剛保始反鎮是役也費白金十萬有奇皆廳民所捐
輸也

八年秋九月大坡舖武生張凌雲謀誅張凌翔等不克
死之

凌雲凌翔之羣從昆弟也性嚴正勇而能謀凌翔逆
迹漸著凌雲心惡之而無以禁也乃密白於夏成業
曰滇回逼處肘腋而凌翔及馬小雙馬九一寶左右
之不早除禍無日矣廳回數千戶黨惡者不過十之
一勢尙孤公誠辱聽生言生請說凌翔執贄門下渠
必喜至則戮之一武夫力耳渠魁授首餘黨可折董
伏也機事貴速願公熟察之成業因收凌翔於門而

不用其策凌雲每奉調防城輒與凌翔俱固請於成業弗聽已而凌翔等果戶官軍敗績於海子舖成業大悔憾乃從凌雲謀簡壯丁百餘名夜往匿凌雲家期以次夕圍而殲之顧隊長懦甚伏三日夕不敢發凌雲家婢汲水供炊爨不輟賊怪之婢以遠客告而廳堂固虛無人也凌雲知事洩立遣其長子幼子偕團丁遁不十里賊佯召凌雲往計事戕諸塗

九年署普安廳直隸同知葉如松蒞任

十年夏五月十五日回匪張定中陷三萬底貢生楊彩

死之

三萬底場赴興義縣大道也濫木橋在其南多回寨
張定中爲之首定中見凌翔方盛陰附之會和議成
凌翔無所肆其毒與馬小雙走樓下河密約定中及
新城仲匪陸萬松等攻新城城中多賊黨漸橫恣縣
丞不能制稟請普安縣令劉代英來城彈壓代英至
新城賊躡其後而合圍焉絕其水道城中大困代英
調濫木橋團首隴權赴援權率團兵萬餘攻團坡輕
騎先進突遇賊團眾不及援倉卒拒戰力竭陣亡權

一名騰雲富而好義喜施與有小孟嘗之稱居常以忠義自矢豪偉不羣南里恃爲屏蔽旁近回族咸弭耳受約束權不亡定中未敢公然肆逆也及是圍眾潰散遠近喪氣新城無外援遂陷代英不屈死賊蟠踞新城興郡大震胡霖澍遣城中回民往撫強有力者皆行既行則盡戮其眷屬興回痛憾誓助逆四出焚殺附近新城二百里悉成焦土漢民死者萬餘定中聞權死喜舉回族反秀民爭附之定中惡楊氏之扼其前也糾凌翔等圍三萬底屯時五月十一日也

彩年七十餘素正直得里人心軍興彩卽場築屯爲
守禦計附近居民依以爲固賊圍急鄰團相率赴救
然懾於賊威萬眾慄慄堅壁不敢動獨樂民里團千
餘人先至入屯助守賊四面環攻屯中鎗礮齊發斃
賊無算賊小卻陰賄彩戚蔣姓僞爲避難來也者夜
靜潛以水淋藥桶及鎗礮且加泥焉十五日賊復進
攻急發礮濕不燃欲易藥則礮洞泥堅猝不可取烏
鎗藥亦不可用人心驚皇賊因而乘之屯遂破殺戮
最慘囚彩一門於別室以彩諸子材武欲用之十六

日賊召彩前誘之降授以偽爵彩罵不絕口賊怒殺之屠其家二十餘口惟一女一孫一曾孫免焉亂平彩孫歸覓遺骸而白骨縱橫不可辨因並瘞一墳名曰萬人墳當圍屯時賊之隕於鎗礮者亦略相等故屯民罕得免云初彩長子文生連枝與定中善定中謀作亂欲與連枝俱婉語曰賊急矣團兵怯弱彼此離心不足以抗敗則俱死耳定中欲權以濟變賊至定中舉白旗應之兵團至君舉紅旗應之苟保地方全民命何惜屈身定中籌之熟矣君謂何如連枝怒

曰是直反耳何名爲權吾家世清白誓以死拒張凌
翔走他邑則已若猶在廳境也吾且提團眾誅之弗
與俱生不能委曲以求全也因辱詈定中定中大恚
顧楊家團眾據要衝計無如之何遣人說連枝才假
道請以鹵獲之資十之二相奉連枝斥之再往乃不
許定中乃與凌翔謀必欲誅之故及於難

六月賊攻東瓜灘營任士雄擊退之

士雄駐師東瓜灘賊由雲南黎山恰耶來攻士雄擊
敗之團兵死者十人賊又由恰耶分黨繞走大坡鋪

長隨鄭大安陣亡大安葉如松之僕也年少喜兵事能上馬擊賊如松壯之賊至大坡舖如松命大安隨廳城團兵防守海子舖我師失利大安恃勇匹馬入賊叢搏賊賊辟易誘之深入築石投之仆遂殪之練丁嫉其成功無援者如松甥蔡姓亦以巡視營壘遇賊死焉

二十一日黃會周景香敗回匪於長擺嶺

二十一日張凌翔破戈密執黃會朱阿龍戮之其黨

周景香迎戰於長擺嶺白旗大潰

同匪旗尙白時呼爲白旗亦曰白號

又有黃號藍號黑號諸名目皆以
旗幟別之統曰號匪黔中通稱也
二十二日回匪由

三萬底進至禡依補泥景香朱小甲擊敗之鎗斃回
首吳辣稗越日再戰斬其先鋒追至樓下河而還凌
翔遁小甲普安縣之戈密人阿龍子也初阿龍習左
道自言能降神封鎗礮入其教者授以咒執刀棍擊
刺如素習名曰降將軍名其教曰寶供教僞稱某聖
某神某將軍轉世救萬民鄉愚多信之官惡其惑眾
置諸獄會賊破普安縣阿龍逸其徒盛於前凌翔懼
其久而難制也故攻之而不虞其敗於周景香也景

香解級報捷同知葉如松獎以功牌由是黃會之名
大著

冬十月十日雲南曲靖府千總何占標攻克華家屯賊
首張志祥伏誅

初葉如松乞師於雲貴總督總督委曲靖府千總署
平彝縣把總何占標募練勇三千餘人赴勦三月占
標由平彝里火燒鋪進師如松會裔鄧逢霖駐猪頭
營委署亦資孔守備鄧飛熊駐海子鋪代理魯土營
土司龍杓駐水田以助聲威賊分駐大坡鋪華家屯

占標亦分兵攻之絕其援十月十日克華家屯斬賊首張志祥賊走大坡舖馬丸一率本部賊走岔河任士雄邀擊之復竄雞場坪官軍併力攻大坡舖

雲南曲靖府回匪馬聯升陷海子舖營亦資孔守備鄧飛熊死之

賊窮蹙求救於滇回逆首馬聯升聯升率眾至夜撲海子舖營潰傷亡無算飛熊督親兵拒戰手刃數人恐被擒辱遂自戕賊乘勝攻水田營龍杓知不敵而歸路已斷乃佯布置守備於營外燃薪炬數十爲疑

兵團兵皆登陴賊見備嚴謂遽攻不下徒損銳卒不
如俟天明留賊防要隘而去夜半杓領士卒越峭壁
出不損一人次晨賊悉眾圍之數重意將使匹馬不
反也顧營中寂無聲賊素懼杓疑不敢進日既午選
健回覘之則空營耳何占標遣駱二木匠復營海子
舖前後夾擊聯升大敗遁回滇

十一年春二月署普安廳直隸同知錢壘蒞任

三月十八日何占標克大坡舖

十一年春龍杓招降了巴山夷匪賊援絕占標急攻

大坡舖三月十八日克之賊潰圍出分爲二一走新城一隨張老滿走北里雞場坪夷砦占標怨軍餉不繼遂休師老滿覘我軍不動盤踞十餘日四出裹脅夷民從之者萬計蓋回匪敗而夷匪起矣初占標之來也軍饟議由廳民捐給月需六千金按旬分解葉如松命前亦資孔巡檢沈培元隨營司糧臺而設局督收司事者多瞻徇富室負緣得減獨苦貧民耳兩月後漸不支旬減二百金遞減至一千五百金是年春僅解二千餘金而民力固已大困已而占標入城

索欠餉民間感占標滅賊功而畏其偏也製明轎迎之沿街男婦跪道香花頂禮占標意得甚而不肯寬貸同知錢璫以同鄉誼數言之弗聽乃請占標遣練偕丁役往四鄉守催尤多需索婦女簪珥百不存一二至有自縊者璫無如何命文生張子瑞詣平彝縣占標家許秋收後償之而求徹練亟請乃允未幾占標爲左右所刺廳民始免練饜之害

二十七日賊陷下江清水河

賊攻下江清水河諸屯破之戮團民數百人二十九

日進攻王家屯爲團兵所擊仍遁雞場坪馬九一走
新城張大格答繞至淤泥河勾結夷匪謝發林王秋
林金正雄仲匪何萬選及水城仲匪岩頭寨土目姬
秉璋等沿村焚掠遊騎至高家渡自是回夷二匪合
而賊勢益張

十一年夏四月教匪朱小甲陷播政

阿龍死小甲逃至廳屬之螳螂仍習其父術從之者
裹黃巾製黃旗號其會曰黃會上年禦回匪於三义
河小有斬獲眾心頗附小甲與花椒寨李正洪謀不

軌上寇石壩爲坎者團民所敗潛匿於媽依之魯庫
播政武生龔發軔謀執之復逃之興義縣之魯屯是
歲四月率寶供教匪萬餘由樓下河踰五朋攻播政
修舊怨也播政係龔氏世業地險要西面九嶺岡差
平龔氏以大眾守之賊不能克乃橫攻桃子樹破之
同知錢壘督團往援據高下擊賊幾不支陰賄內應
殺守隘者長驅入龔正芳陣亡小甲旣據播政分股
擾媽依諸寨陳崑山屯補泥以拒之坎者南里團兵
擊小甲於魯木舍斃賊百餘生擒僞翼長朱廷保僞

都統彭老四獲黃傘一旗械無數賊遁歸戈密下坎者諸寨皆反正復進擊賊於保冲箐擒僞都統柳黃甫獲其僞印

五月同知錢壩率團援普安縣不克

回匪馬河圖圍普安縣錢壩督團赴援遇賊於九龍山我師不利繼戰於九峯寺賊敗走壩策騎急追突伏賊從林莽中出大呼曰先取馬上頭目餘人不足殺也鎗及左脇壩驚避墜深坎下團兵大驚以爲死矣一夷兵紆折下負壩出團兵奮力抵拒乃免壩出

笑曰賊太莽苟寂無言死矣賊乘勢進焚三板橋時
大饑斗米銀一兩二錢軍糧不繼聞張凌翔竄青山
欲乘虛襲廳城星夜引軍歸賊得併力攻城城隨破
縣令胡失名盡節死賊亦以無糧旋引去
冬十月教匪朱小甲進踞洗地基

小甲糾樓下河五朋回匪合眾數萬由接官廳渡河
進踞洗地基螳螂諸處同知錢堦遊擊鄧逢霖分道
堵禦連日接戰頗有斬獲賊敗走尋又竄糯白爲團
民所扼仍也去

十二月安義鎮總兵趙德昌克洗地基

德昌督委員曾輔忠都司盧希恒勦洗地基賊坎者
團兵助戰克之獲偽印及軍械無算

同治元年春正月教匪李正洪陷白雨屯

上年四月陳崑山駐營補泥至是以糧盡退師李逆
乘虛攻歸順營破白雨屯據之

秋閏八月八日回匪陷廳城

李正洪既克白雨屯復爲陳崑山所扼不得逞崑山
忠勇軍興毀家募練屢挫賊鋒羣賊皆畏之廳諸生

葉萬華者素無賴里人惡之會歲饑無貸升斗者憊
極夏乞米於崑山意頗奢崑山引至倉所指示曰軍
糧家食悉在此矣足下誠迫請具囊以來曰新穀尙
暹吾意君之盈餘也故來是區區者多取則損君寡
取則於我無濟敢辭乃走投李正洪賊中鮮文士正
洪引爲參謀而迎其母妻偕居正洪欲取廳城問計
於萬華萬華曰我之不得志於廳城也以陳崑山故
耳今青黃不接廳城苦飢若約結張凌翔夾攻陳營

賊中謂陳崑山
團兵爲陳營

以牽制之而別出一軍窺廳城可以

城破後其運至花貢城內絕望無固志八日賊整隊
都田穀石均爲賊有

入城越數日凌翔偕馬河圖至議屠城景其全諫曰
舉大事者務收人心今甫克一城卽肆殺掠失新附
之望塞歸順之途誰爲將軍畫此策者誤將軍甚矣
普安爲將軍生長地父母之邦必恭必敬將軍獨無
意乎凌翔曰君言是吾慮不及此議乃止其全興義
郡舉人賊虜至軍中奉爲謀主其全求死不得乃佯
竭智輸忠謀賊信之不疑而陰爲漢人地廳境及興
義六屬皆受其庇後爲凌翔所覺僞邀議事而潛遣

人刺之中途凌翔不欲人知歸罪部卒厚葬之且卹其家

冬髮逆石達開竄廳境

達開髮逆洪秀全部將賊中所稱偽翼王也驍勇善戰黨於偽東王楊秀清秀清專擅秀全心惡之忌其黨眾不敢發會偽北王韋振自江西敗歸秀清戒城卒勿納且命之曰不復江西無入朝秀全爲之請乃許及偽朝秀清責振喪師失地罪振大慙恚潛謀於秀全召秀清入宴卽席斬之達開在江西聞之怒誓

城破後其運至花貢城內絕望無固志八日賊整隊
都田穀石均爲賊有

入城越數日凌翔偕馬河圖至議屠城景其全諫曰
舉大事者務收人心今甫克一城卽肆殺掠失新附
之望塞歸順之途誰爲將軍畫此策者誤將軍甚矣
普安爲將軍生長地父母之邦必恭必敬將軍獨無
意乎凌翔曰君言是吾慮不及此議乃止其全與義
郡舉人賊虜至軍中奉爲謀主其全求死不得乃佯
竭智輸忠謀賊信之不疑而陰爲漢人地廳境及興
義六屬皆受其庇後爲凌翔所覺僞邀議事而潛遣

晉書卷一百四
三
人刺之中途凌翔不欲人知歸罪部卒厚葬之且卹其家

冬髮逆石達開竄廳境

達開髮逆洪秀全部將賊中所稱僞翼王也驍勇善戰黨於僞東王楊秀清秀清專擅秀全心惡之忌其黨眾不敢發會僞北王韋振自江西敗歸秀清戒城卒勿納且命之曰不復江西無人朝秀全爲之請乃許及僞朝秀清責振喪師失地罪振大慙恚潛謀於秀全召秀清入宴卽席斬之達開在江西聞之怒誓

殺振以報秀清率精騎馳歸易服匿金陵城外民舍
夜縋城入殺振仍縋城走江西嗣是不復與秀全合
初秀全廣東花縣漁家子也幼有怪徵秀清挾星命
術遊花縣見而奇之振倡亂秀全往依焉畫策屢有
効得重用因盛稱秀全有帝王命勸振迎之奉以爲
主卽僞太平王也秀清權譎多謀略功在誅酋右振
首起事爲諸酋長老髮匪皆其舊部使不自殘殺亂
未有艾也二酋死金陵大亂振子姪出降大軍秀清
部下亦多有降者又失達開髮逆由是衰矣達開所

侵江西郡邑旋爲官軍克復不敢歸金陵咸豐九年
竄湖南圍寶慶三十餘日湘中求援於督師曾國藩
國藩方駐師鄂中以桑梓誼遣李續賓率兵五千歸
救與劉長佑田興恕合擊之賊大敗解圍走粵西至
桂林尙有眾三十萬分爲二一從永福下一從陽朔
下以數千人營西南門外阻城兵而大隊自西門外
妄行先後二十餘日始畢賊軍分七旗第四旗尤標
悍中軍在焉寶慶之敗官軍晝夜追襲不停趾七戰
賊皆北達開忿麾中軍反戰官軍乃退以己未八月

二十一日至陽朔九月十四日其後軍由高田墟拔

營軍於荔浦縣之馬嶺墟

去高田墟三十里墟市集
黔人謂之場北人謂之

粵人謂之墟柳柳州
詩絲荷包飯趕墟人

午後桂林藩司蔣益澧追師至

仍營高田墟朔邑各鄉團亦會西鄉團民三千人欲

獨進擊賊以自異夜三鼓先大軍發半道遇四騎如

飛而至鬣髮毳毳長數尺則日中所見軍中謀者也

問團民何早曰欲入馬嶺清館舍以俟曰賊眾不可

輕吾輩甫進墟覘視知非第四旗火藥亦乏然夜靜

人聲薨薨如蜂羣殆將數萬出經五里亭戮瞭夜賊

五然後返請止此須大軍後進賊未可輕也出其刀
示之血痕猶濕團兵聆其言乃止次晨大軍行抵鐵
帽嶺

去馬嶺
墟十里

賊黨萬餘已列隊迎敵急駐師嶺上築

營壘嶺土阜高二十丈許甚平漫賊擁而登軍中寂
然仍務畚鍤比近始發號鎗礮雷震輪環迭施賊大
奔追至山足而還蓋營壘未成又後路賊之在五里
亭前後者勢尙盛故不欲輕進其慎如此達開歸潯
州祭墓黨眾分據慶遠思恩南甯太平鬱林及粵東
高州廉州至是率其黨入滇經廳境擄百餘人自雲

南金沙江渡入川其前鋒賴剝皮先驅過陝甘所遺
路誌爲我師移置夷中夷中深箐絕澗達開至迷路
不得出無所得食大飢困乃降川督駱秉璋斬之城
都市

二年春二月任士雄陳崑山起兵復城不克

賊旣得廳城旋往攻興郡屬邑

不數月屬城皆下

留數十人

守廳城以馬九一

即馬負圖

馬仁恩統之九一懸千金賞

捕陳崑山崑山走匿漠之平彝縣九一復遣書任士
雄盛陳禍福且遣辨士招之士雄不答與崑山約舉

義旗復城駐營鄆官屯及賊戰於元壇廟不利而歸南里團兵亦退是役也二人皆不至故無功三月十二日賊犯拖長江士雄伏兵以待大敗之擒斬百餘追至鄆官屯而還士雄與李夢松謀再舉僉曰孤軍獨進難以成功非奉官檄無以號召諸團今各團以無官故皆瓦解黔省道塗阻塞官何由至計不如仍迎舊官各鄉團聞舊官重來知廳中有主必殺賊自效如此則廳城可克大功可成矣士雄從之遣文生張良臣率壯丁數十往威甯迎錢壩

三月前署普安廳直隸同知錢堦至拖長江

城陷堦奔威甯作秦廷哭貴西道鄧爾巽弗之應久之爾巽知堦之能得廳人心也乃許濟師是年正月命堦返普安糾鄉兵復城給以木質鈐記以印失故也委府經譚守清率遊勇五十人隨行別札普安各鄉團協力助順檄水城廳供途中軍食堦行抵水城高家渡夷眾阻路不克進水城廳糧亦不至引還威甯會張良臣至具述士雄意堦大喜請於爾巽爾巽亦喜助以道勇三十名紆道由雲南宣威州行三月

至拖長江札諭各鄉團約期舉義

夏四月同知錢壩督團兵復城不克

壩督拖長江西沖諸處團兵復城遊擊易飛熊代理
魯土營土司龍汝駒把總何大用歐陽榮琳董懷經
等咸起師來會築聯營五座於元壇廟陳崑山與牟
鴻景蔣天香等亦進軍白菜灘任士雄率團攻北門
及賊戰於平街我師失利陶正榮陣亡壩返江上飛
熊等亦退

五月二十六日南里兵變陳崑山牟鴻景蔣天香等被

執不屈死之

崑山與從九蔣天香牟鴻景等復起兵復城軍於吳官屯城賊告急於新城五月十二日援賊至攻豆厓坡前營十九日破之屠百餘人餘營聞風驚潰二十三日破白家坑戮男婦四五百人初賊張僞示禁殺掠誘漢人歸附不順者擊滅之民間畏威莫敢支拒及是南里團兵至白家坑頭目馬景元率屯民助攻城賊以爲反覆故屠之景元奔拖長江賊進攻吳官屯練目嚴得功與賊通潛以水淋火藥鎗礮二十六

日賊攻急營中譁變執崑山天香鴻景等解城賊崑
山等皆大罵不屈馬負圖恣割崑山左耳引至教場
縛崑山於柱先磔鴻景俾崑山觀之次磔崑山天香
及壯士十餘人咸被害賊傳崑山首於拖長江以示
威暴屍教場旬日不腐不臭亦無鳥啄犬噬之害舊
部林姓憐之盜其屍歸葬陳氏山中見一所竹葉堆
積喜曰是足以藏忠骨矣去葉一棺在焉蓋陳氏物
也崑山畏焚如之慘徙置於此因取以殮

六月十六日同知錢堦督任士雄等攻廳城克其礮台

十八日克廳城逆首馬負圖伏誅

團兵既敗壩復返拖長江適奉大府投誠免死示轉
傳城中城民喜多欲爲內應壩與任士雄議曰曩者
再舉復城皆無功兵非不多咎不精耳兵法無選鋒
者敗今宜懲前失選取精銳銜枚夜進既有內應何
患不克乃懸重賞簡壯士百名誓於江上迴龍寺以
月黑夜襲城比附城輒爲賊所覺不得入如是者再
壩諭諸壯士曰若輩踴躍復城志甚勇謂可掉臂入
也今機不洩而事無成余甚惑焉意者若輩有所仇

於城中人欲乘勢報復故鬼神不佑乎若輩多城中
難民城中父老子弟非爾族友卽爾戚里余與若輩
仇賊耳何仇於城中人逞私忿而戕無辜此行軍大
戒也曹彬下江南市肆安堵不戮一人敵國且然矧
在交境若輩盍再盟於神乎僉應曰惟父母官命復
誓於迴龍寺六月十六日夜襲西門礮台據之殲守
礮賊盡西門踞城後山巔俯瞰城中賊羣萃西城堅
守諸城堞鏖戰兩晝夜不得下壘謂士雄及諸團首
曰逆賊盡於是矣彼扼要拒守力與之角所傷實多

未可以旦夕克也吾按兵不戰以緩之諸君各率本
團兵從城左右下趨攻東南北三門彼必分黨返顧
合則力强分則力弱吾與子英據高擊之蔑不濟矣
子英士雄字也諸團遂行賊見我師左右下懼亦分
眾左右援士雄率壯士驟起躍而下賊猶以死拒壯
士劉精明杜金有中礮而殞我師既入城第百倍陣
斬逆首馬負圖及悍回數人賊大潰馬仁恩率其黨
走新城遂復城十九日壘入城安民申報大府大府
嘉廳民義勇賞給五百金文武執事暨士雄等升叙

有差

捐義穀

既復城堦深鑿前轍謀所以善其後者念無糧之不
足以固守也倡捐義穀五千石儲城倉中備緩急念
小團之不足以拒賊也聯廳境爲十三大團以厚其
力各視其地之所出養練勇數十名或數百名以資
調遣念愚民之不知順逆也分設義學四十餘所以
教誨之俾明大義而識尊親他如修城隍製軍火軍
械善後事宜次第舉行本末畢具堦故饒吏才至是

益勤恤瘡痍加意拊循優待團紳諄諄相戒勉不異
家人父子以故各團歡然用命事無不舉民用大和
四境晏如稱樂土焉他郡之避難於廳城者千有餘
家商賈輻輳貿易盛於往時巍然爲上游州邑冠矣
九月教匪上竄同知錢堦率團兵迎擊敗之

教匪據播政久欲上竄朱小甲由補泥走十里坪李
正洪由嗟喇河走歸順營錢堦督坎者團兵擊走正
洪斬賊首楊大福牛大桿子王大父劉都統等移擊
十里坪賊營戰於打牛廠斬僞先鋒廖小乙李小五

普安府志 卷十四
等賊仍退播政

冬十二月署普安營遊擊傅得勝蒞任

得勝從安義鎮總兵趙德昌勦興郡回匪積功至遊擊大吏郎軍中委署普安營遊府酬前勲也得勝既受命仍效力行間未嘗至廳城黃會朱小甲據獨山有年積糧固守獨山一峯特起山麓皆浮沙滑不留足猿猱莫能上團兵屢攻不利冬十一月得勝移師勦青山回匪克之進攻獨山旬月不拔錢壩貽之書曰獨山險絕非可克日下也歲除矣盍歸乎得勝得

書乃罷攻因至廳城視事

三年春二月二日遊擊傅得勝克播政

正月十六日錢堦商請得勝勦播政李正洪遣土人
守九嶺岡土人本龔氏佃戶得勝語龔氏貽書諭之
土人苦教匪之虐願爲內應得勝至土人出戰佯北
遂長驅入壓播政而軍正洪懼率其黨二百人遁依
回匪二月二日克播政擒斬十八人獲其僞印復進
勦獨山賊日夕攻擊朱小甲窮蹙乃降

夏四月遊擊傅得勝擊張定中降之

濫木橋回匪老巢也得勝既平五朋大坑諸賊移師擊之匪出戰輒敗定中窘乞就撫得勝許之定中厚禮犒師且進珍物得勝曰此不義財也悉移交有司備善後費聞者服其廉

五月普安營遊擊傅得勝率師復新城中礮而卒

定中降得勝進營小友蘇以駮新城日晡輕騎出視戰地爲飛礮擊死屍亡未獲隊長龍耀光亦死報至廳城爲之罷市具衣冠葬之武廟後送殯之口哀聲

載道

教匪陷播政

朱小甲等聞傅得勝死糾回匪僞都督張大格答復
陷播收殺土人百餘惡其引官軍入九嶺岡也

秋七月九日新城回匪上竄同知錢壩率團兵禦之賊
乃退

新城回匪悉眾上犯壩督各團兵禦於十里坪軍功
林開華率練十餘人夜劫賊營中鎗而亡我師亦陣
擒賊首李老五相持五十四日互有殺傷九月三日
賊棄營遁以馬忠反正也馬忠者興郡回民俗呼馬

裨裨回中僞將軍也矯捷多力張凌翔陷興郡六屬
皆忠力倚如左右手凌翔歸新城命忠守興郡貞豐
州文生張西銘亦回人素負忠義疾凌翔所爲偕桂
全五說忠反正忠大感動從之凌翔聞興郡有變與
馬河圖疾驅至城策騎先入忠截巷擊之賊大敗凌
翔河圖皆授首

錢堦勦教匪克之李正洪伏誅教匪平

正洪據山嵐滋擾得勝營諸處堦移師擊敗其眾軍
功屠連友生擒正洪誅之朱小甲潛遁教匪平

冬夷匪金正雄竄猛者錢堽擊走之正雄伏誅

先是七月三日堽命譚府經守清偕士雄攻泥阿都
駐土城十餘日戰不利亡團兵十五名遂歸至是金
正雄竄猛者同匪張大格答亦滋擾普陌營昭子河
堽率士雄等攻猛者士雄進營猓田十二月二日賊
迎戰敗之斬正雄於陣旋破米妥餘賊就撫回匪遁
惟泥河都張小長竊踞如故

十二月二十八日錢堽至自軍

堽以七月出師至是始返有勸堽速歸者堽曰羣盜

未平敢偷閑乎

四年春二月泥阿都逆首曾阿林降北里平

錢堦復命譚委員守清備任士雄等攻泥阿都十六日克之曾阿林投誠北里平

四年冬十月盜殺新委晉安廳直隸同知陳世鎮

陳世鎮四川筠連拔貢以軍功累保同知直隸州四年署興義縣事得團紳心未幾而有林自清之難自清郎岱人從滇軍積功官提督凶暴無人理獨與馬如龍善滇督張亮基謀誅之顧回逆方熾肘腋皆伏

戎岌岌危城朝不能保夕恐有他變更委曲撫慰恩
禮並至冀獲須臾安自清益狂悖欲害亮基據漠
叛亮基窘會奉

詔入

覲權辭語之曰吾去代吾位者非將軍不可行且入告矣
妻孥皆留此幸善視之出

奏草相示自清喜乃止俄臨安告急亮基命自清赴勦而
盡室北行自清星夜反追之弗及遂據漠城總督潘
鐸漠撫鄧爾恒皆爲所害回族忌自清佯與議曰雲

南小不足容二部蜀中富於滇君居滇則吾往取四
川君若往四川當奉百萬金爲軍費自清欲得金挾
雲南督撫提督三印部眾二十萬自金沙江渡蜀中
多江河不利陸軍攻數城皆不克走鹽井驅裔民而
奪之幾三年矣已而川督駱秉璋平髮逆石達開藍
號李短辮子軍威大振自清氣餒歛迹不敢肆秉璋
選有口才者往說之使散其眾歸鹽井於官並上三
印自清一一如命復歸黔南謁巡撫亮基不見用適
新授雲貴總督勞崇光過黔夤緣得充親軍隊長隨

入漠抵曲靖滇提督馬如龍致書於崇光曰都人望
公如望歲相約郊迎聞自清重來便議閉城公能
自清乎崇光貸自清三萬金無以償躊躇罔決滇藩
司岑毓英及如龍代償之崇光因委自清反勦興義
回匪自清先驅至興義縣聲言必入城邑人震駭世
鎮曰彼自稱安義鎮總兵真偽未可知拒之則授隙
延之則賈禍吾當舍一身以衛百姓耳命紳團出郭
迎俯伏道左禮甚恭而身坐城樓謾罵之閉門拒弗
納紳團僞爲調停也者往反再四自清眾飢疲不得

已以城外片地請許之越三日自清置酒鐵樹宮邀世鎮飲世鎮盛氣相凌折自清忿然恍於公論未敢發席散世鎮挈印之鄉紳劉官禮家夜三鼓自清率眾圍縣署虛無人知世鎮其官禮善因置之署藩司曾璧光聞世鎮與自清忤改委普安同知遷之善地世鎮至南里不果入城徑反筑垣自清遣其黨五十人易服躡其後刺之老鷹崖其長子先洋反轡鬪奪矛斃一人卒以力不敵與二僕俱死時北里易飛熊署廳營遊擊聞之怒曰老賊不道戕命吏而嫁禍吾

廳是不可縱也飭團兵疾追殲其眾幾盡至毛口河
聞自清已渡乃已世鎮妻葉氏愬大府不已爲請
朝得

旨世鎮閉關拒絕燭識幾先林自清著曾璧光設法誘致
正法軍功陳啟祥宴自清酒半伏發自清欲起而辮
髮纏繞不可脫遂伏誅自清膂力絕人自矜無對馬
前大燾製蓋世英雄四字初不意杯酒之間能制其
死命也勇之不可恃也如是夫自清橫行滇黔蜀三
省戕文武官吏數十百計養成其惡不復可制獨以

晉之風志 卷一四
害世鎮正法則葉氏力也世鎮弟世鏞任龍泉縣
陣沒叔弟世銛任桐梓縣手戮賊首爲逆黨所戕撫
軍曾璧光以世鎮同懷三人並宦黔省皆有惠政先
後捐軀一門忠義請建三忠祠於原籍筠連縣以先
洋從祀並將事蹟宣付史館具

奏奉

俞旨聞者榮之

五年冬十二月署普安廳直隸同知林福培蒞任
秋八月同知林福培飭團兵援興義縣

新城回匪圍興義縣官民飛書乞救林福培飭各團
分道往援先後攻克龍井無拉樓下河舊營阿甸鎮
羅田馬別橋諸賊營十月賊遁歸新城乃班師勅馬
忠既戮張凌翔等自爲安義鎮總兵新城賊懼討赴
雲貴總督勞崇光乞撫崇光委員偕天主教任司鐸
名失至新城安撫仍命馬忠署總兵事是歲二月興郡
回民復亂馬忠與張西銘走新城回匪殺之

六年署普安直隸同知吳宗蘭蒞任

七年提督貴州學政廖坤培按試廳城

往歲歲科試例赴興郡附考時興郡不靖吳宗蘭與紳團議迎請學使廖坤培按試廳城興郡六屬咸就試焉亦僅事也上年官軍勦貞豐賊是年勦安南賊回匪內顧不遑宗蘭飭各團嚴堵關隘畢試晏然八年春三月同知吳宗蘭飭團兵援普安縣

三月安南縣回匪糾苗匪攻普安縣宗蘭飭團兵往援逆首陳千桿迎戰斬之斃賊二十名進抵縣城賊解圍去追至芭蕉關而還

夏四月苗匪岩大五上竄

代理安南營都司馬金奎降回也以釁殺安南縣令
遂據安南聞林自清被誅內不自安與其黨譚五
引下游苗匪岩大五岩小五潘大五等竄過盤江青
山回匪保老四等竄過深溪河謀犯廳城宗蘭督各
團守涼水井白凹口高家屯迭與賊戰殺賊首雷六
五復由蓮花山抄擊賊後鎗斃偽普四將軍斬八十
餘級任士雄等守梅花箐堵安南縣賊賊之由安南
來者眾且悍連日接戰互有勝負賊分黨攻普安縣
擾三板橋均爲鄉團擊敗望後賊乘雨夜過河士雄

等潰退宗蘭商請署廳營守備董懷經出駐高家屯而令士雄回防本團不數日梅花箐及安南縣屬之下山屯相繼失守賊進營楊松舊普安楊家屯城中戒嚴宗蘭稟督撫請援兵而調各鄉團協守

五月六日峇大五攻廳城

六日賊進攻廳城守陣者發礮擊之斃賊首黃大五八日馬金奎偕苗匪數千夜由龍頸子黑土坡至西門礮台架雲梯登城及堞圍練方覺奪獲雲梯二架任士桐鈕斷矛二枝賊始退九日夜賊潛越高家屯

團營度東門河仍以雲梯登城城上礮台齊發有躍
下殺賊者賊敗走奪獲雲梯一架時連日大雨河水
漲溢我師追急賊誤奔深坎中溺死十餘人高家屯
營亦於是夜自潰賊進營高家屯陶家溝

十一日雲南宣威州包於連率練勇二百餘人援廳城
十八日幫辦興義府軍務委員清江通判毛寨率練勇
二千人援廳城

宣威州興郡距廳近故二軍先至

二十日吳宗蘭裔請董懷經及諸團兵出獅子口張官

屯劉官屯三處築營以資防禦自西門礮台賊退之
後宗蘭慮西門僻遠賊將復至命歐陽榮琳出營西
門城外營成賊不敢復窺西城時城守完密鄉團齊
集宗蘭謀出之城外爲犄角故有是命

二十六日賊擾三板橋高山坡團兵擊退之

賊晝夜攻城宗蘭督團民堅守若大五以北里團兵
畢萃城中鄉間皆老稚若繞道從北里返攻團兵可
以得志乃遣譚五受潘文龍率賊眾數千分竄三板
橋爲坎者團兵所扼賊計沮其竄高山坡黑冲者適

任士雄回江上防守遇於關口擊走之

六月四日署興義府知府葉正邦率師援廳城

正邦署興義府兼攝興義縣率練勇二千人至

興義縣圍兵援廳城

初興義縣圍首劉官禮與廳人爲難

見錢堦傳

既而悔之

及是聞廳城有警遣鍾鶴軒率圍兵二千人來援語之曰往吾獲咎於普安廳恒耿耿不釋於懷今廳城被圍理無坐視棄怨尋好在此行矣吾子勉之

六日黔軍援廳城

乞師稟至黔撫軍曾璧光檄安義鎮總兵楊發貴督
總兵池有蓮副將楊愷臣趙明清練勇三千人赴援
發貴命有蓮等先率練一千五百人繞道由水城至
城十五日發貴亦至

雲南平彝縣楊老九

名夫

率練勇二千人援廳城

老九及包於蓮越境赴援急鄰難也時未嘗乞師旁
邑而諸軍雲集救災恤鄰可不謂義乎

九日署普安廳直隸同知李斌蒞任

斌由水城廳調署廳同知調水城團首副將胡成龍

率練勇三百餘人作親軍小隊亦援兵也練勇陸續至城十三日成龍至

滇軍援廳城

乞師稟至滇制軍劉嶽昭檄總兵張松林副將劉奇義率練勇三千人赴援委員任荆門理糧台事

十一日援軍擊賊賊敗解圍走安南

援軍陸續至者萬餘逐日出戰賊猶力抗我師不少退張總兵松林議併力合擊十一日援軍皆出同知李斌督團兵分道偕進扼隘堵擊賊大敗解圍走安

南生擒賊數十人死亡不可勝計廳城解嚴是役也
援兵民兵軍食咸仰給倉穀復由各團備犒軍銀四
萬餘兩惟滇軍設有糧台興義團兵自備糧餉無所
取

濫木橋回匪張定中以廳城被困率逆黨千餘擾兩穀
平地司家寨聞岩大五敗乃遁

十三日援軍克高家屯

賊既解圍其據高家屯者如故十三日援兵及團兵
攻克之斬二十餘人獲大礮五尊

雲南平彝縣黃泥河文生張旭中援軍至率練勇千餘人

諸軍惟旭中後至其義不可沒也故書之

二十日滇軍統領張松林班師

滇軍既行包於蓮楊老九張旭中葉正邦鍾鶴軒亦陸續班師二十八日楊發貴勦安南賊胡成龍赴甬穀防堵先是十九日發貴前鋒營池有蓮等以前際與成龍軍交鬪飛子傷途人至是諸軍皆行廳城晏

然

音步履志 卷十四
秋八月八日岩大五竄深溪河坎者團兵擊退之

岩大五復上窺廳城黨眾萬餘竄過深溪河李斌飭
坎者團丁禦於老紙厰時田禾方熟賊立營南星獲
民穀爲糧十三日賊挑戰我師分隊埋伏誘賊入伏
中縱擊之賊披靡棄營而遁軍械糧食皆爲我師所
有追過深溪河戮數千人生獲四十三人十五日賊
夤夜渡河劫營爲我師所覺不得逞仍歸青山老巢
九月九日官軍克復安南縣

九月署興義府葉正邦委清江通判毛寨督練勇由

江西坡會楊發貴前鋒營進攻安南縣北里團兵亦
由馬場進師九日復安南冬十月發貴來廳城索
金賊乘間復陷安南縣得而復失盡棄前功惜哉
冬十一月賊陷白沙屯

白沙屯臨驛路鄉民築屯堅守十餘年於茲矣十
月朔旬苗匪夜攻陷之人民死亡過半逃出者無幾
累年積蓄盡爲賊有

安義鎮總兵楊發貴及賊戰於茶廳我師敗潰

苗匪進據海寨楊發貴軍及北里團兵營於崧巋寺

以禦之與賊遇於茶廳戰不利亡團兵六七十人董
懷經受重傷數日而卒

十八日官軍潰

發貴軍及團營皆潰同知李斌調各團分道堵禦賊
亦尋退

九年春署普安廳直隸同知盧縻蒞任

三月團兵禦回匪於紫河

回逆竄安南縣屬之江西坡逼近廳境同知盧縻調
北里團兵營於紫河地瓜坡以禦之賊知有備乃不

敢上犯

十年冬十月署普安廳直隸同知嚴金鼎蒞任

十一年冬十一月官軍合圍新城逆首張定中降回匪
平

上年曾中丞璧光以興郡回逆未平

奏請用兵奉

旨雲貴合勦滇以沈觀察壽榕爲督辦吳鎮軍元彪爲統
領黔以吳觀察德溥爲督辦貴州提督周達武爲統
領合軍十餘萬皆楚軍也德溥以廳民屢經戰陣調

各鄉團隨營助勦自備軍食每立營率團兵居前以次移進十一月八日團兵從何鎮軍世華攻破青山賊巢獲糧四百石十日攻破泥堡賊巢獲糧二千餘石均解大營遂進逼新城築長圍以困之是年滇軍克復興義府興義縣周達武克復安南貞豐十一日達武至軍逆首張定中出降於達武回匪平留楚師萬人守興郡要害餘軍凱旋初定中附張凌翔凌翔死遂長其羣險惡尤甚懼廳人往討佯語曰普安吾桑梓也相待厚於他邑廳人因就羈縻之同治初戎

事旁午費不足設局捐輸錢壙命潘江泌往濫木橋
以軍需爲言且勸之降定中曰捐輸所以勦賊直勦
我耳我不敢違父母官命予五百金再往亦如之其
畏廳團如此定中進犒師金鉅萬珍寶無算隨黔軍
至筑垣冀不死而滇督劉嶽昭必欲誅之自知不免
乃自盡大坡舖係回匪肇釁之所辛酉春爲何占標
所破逃往新城及是尙存三百餘家達武交土司龍
樾挈歸魯土營安置悉以大坡舖逆產入公民情大
安自是漢回感戴

皇仁安生樂業歌詠太平永遠無極懿乎鑠哉
聖天子之明德遠矣

